

宋史新編

宋史新編卷六十二

列傳四

明南京戶部主事莆田柯維騭著

宗室

吳王頴

益王頴

吳王佖

燕王俟

楚王似

太子茂

鄆王楷

肅王樞

景王杞

濟王栩

徐王棣

沂王栢

和王栻

信王榛

太子諶弟訓

太子勇

信王璩

太子懌

魏王愷

太子詢

鎮王竑

英宗四子長神宗次顥次顏次頤顏早亡徽宗追封顏  
潤王

吳王顥字仲明初名仲紕累官檢校太傅保寧軍節度  
使同平章事封東陽郡王神宗進封昌王官制行拜司  
空徙王雍哲宗徙封揚遷至太傅歷京兆鳳翔數鎮自  
熙寧以來顥屢請居外不許元祐初乃賜咸宜坊第一  
區榜曰親賢拜太尉官其諸子制曰先皇帝篤兄弟之  
好以恩勝義不許二叔出居于外蓋武王待周公之意  
太皇太后嚴朝廷之禮以義制恩始從其請出就外宅  
得孔子遠其子之意二聖不同同歸于道皆可以爲萬

世法昔漢明帝問東平何以爲樂王言爲善最樂帝大  
其言因送列侯印十九枚諸子五歲以上悉佩之天下  
不以爲私今王諸子性于忠孝漸于禮義自勝衣以上  
頎然皆有成人之風朕甚嘉之其各進一官以助其爲  
善之樂尚勉之哉母忝父祖以爲邦家光徙封徐詔書  
不名後拜太師改淮南荆南節度使累封楚王卒年四  
十七贈尚書令兼中書令揚荆冀三州牧燕王諡曰榮  
徽宗改封吳王顥天資穎異嗜學知禮子孝騫嗣終寧  
國軍節度使晉康郡王孝錫嘉州團練使贈永國公凡  
神宗諸弟之後其行自孝而下曰安曰居曰多曰自曰

甫云

益王頽初名仲格歷官略與顥同更十節度徙王曹荆至太尉卒年三十三贈太師尚書令荆徐二州牧魏王謚端獻徽宗改封益王頽博通群書工飛白篆籀子九人孝哲早亡孝奕彰化軍觀察留後贈司空平原郡王孝參歷三節度使封豫章郡王孝永邗州觀察使贈司空廣陵郡王孝詒孝隲孝悅孝穎孝愿皆至節度使神宗十四子長侑次僅次俊次伸次僩次哲宗次价次侔次似次偉次徽宗次俛次似次偲八早亡侑僅中宗徽宗追封王爵後僩价改封焉

吳王佖初授南山東道節度使封儀國公哲宗加開府  
階進封申王拜司空帝崩佖於諸弟爲最長有目疾不  
行立徽宗嗣位拜太師歷任尹牧徙國陳卒謚榮穆贈  
尚書令兼中書令徐州牧燕王加贈侍中改封吳王子  
有奕武信軍節度使和義郡王凡哲宗諸弟之後僅再  
傳其行曰有云

燕王佖越王偲初俱授節度使檢校太尉佖封成國公  
偲封祁國公哲宗朝俱加開府階封郡王後累換節鉞  
歷任尹牧佖進封莘王偲睦王徽宗朝俱歷太傅佖累  
封燕王偲累封越王靖康元年同遷太師二年上皇幸

青城父老邀之不及道遇二王哭曰願與王俱死徐秉哲捕爲首者戮之益兵衛送二王于金營北行道卒紹興初有崔紹祖者至壽春府稱越王次子受上皇蠟詔爲天下兵馬大元帥興師恢復事敗斬越州市

楚王似初爲集慶軍節度使進封郡王元符初封簡王似於哲宗爲母弟哲宗崩皇太后議所立宰相章惇以似對后曰均是神宗子乃立端王是爲徽宗加司徒徙封蔡拜太保更歷數鎮以王府史語言指斥送大理寺驗治似上表待罪左司諫江公望上疏以爲親隙不可開疑迹不可顯一有浸淫旁及蔡王之語不識陛下將

何以處之陛下何顏見神考於太廟乎疏入公堂能知  
淮陽軍徽宗頗思其言止治其左右崇寧中徙鎮荆南  
武寧卒贈太師尚書令兼中書令冀州牧韓工改封楚  
王謚榮憲子有恭定國軍節度使永寧郡王

哲宗太子茂劉皇后爲賢妃時所生三月而夭追封越  
王謚冲獻徽宗追冊爲皇太子改謚獻愍后之立也右  
正言鄒浩三上疏諫隨削其橐至是或謂浩疏有殺卓  
氏而奪其子欺人可也詎可以欺天平之語徽宗乃峻  
茂典冊復竄浩遠州后上表謝然浩蓋無是言也

徽宗三十一子長欽宗次樾次楷次楫次樞次杞次栩



次棧次高宗次材次模次植次朴次棣次櫟次拱次栳  
次榛次椿次握次捷次機次挺次樾次橫次椅次棟次  
榑次桐次枳次樅七早亡櫟楫材朴拱椿追加王封機  
始生爲陳國公云

鄆王楷初名煥累封嘉王歷十一節度使重和元年廷  
策進士唱名第一徽宗不欲楷先多士更以王昂爲榜  
首楷超拜太傅改王鄆欽宗立改鎮鳳翔彰德軍靖康  
初與諸王皆北遷

肅王樞自吳國公累今封歷六節度使靖康之難金人  
要親王爲質且求輸兩河於是樞爲所留挾以北去

景王杞濟王栩竝歷節鎮開府進今封至太傅靖康之  
難杞從欽宗幸青瑯城及上皇出郊杞日侍左右衣不解  
帶食不御肉上皇累發願文述祈天請命之意授杞杞  
頓首泣及北行鬚髮盡白當時金帥索諸王家屬栩夫  
人曹氏避難他出公秉哲捕而拘之遂俱北

徐王棣沂王櫟和王栻信王榛所歷官封槩與諸兄同  
靖康之難與兄益王棹祁王模莘王植及其幼弟安康  
郡王握廣平郡王捷相國公挺瀛國公樾建安郡王模  
嘉國公椅溫國公栾英國公榘儀國公桐昌國公柄潤  
國公樅俱北遷櫟至北方與駙馬劉彥文告上皇左右

謀變金遣人按問上皇遣莘王及駙馬蔡條等對辨凡三日樛彥文氣折金人誅之榛行至慶源亡匿真定境中時馬廣與趙邦傑聚兵保五馬山砦陰迎榛奉以爲主兩河遺民響應榛遣廣奏乞委以總兵與諸砦約日大舉黃潛善汪伯彥疑非真高宗識榛手書遂除河外兵馬都元帥潛善伯彥終疑之廣知事不成留大名不進會有言榛將渡河入京朝廷因詔擇日還京以伐其謀金人恐廣以援兵至急發兵攻諸砦斷其汲道砦陷榛亡不知所在或曰後同上皇居五國城紹興元年鄧州有楊其姓者聚衆稱信王鎮撫使翟興覺詐將斬

之二年萬州有李勅亦自稱徐王驗其詐棄市

欽宗太子誡政和七年生爲嫡皇孫亦祖宗以來所未有  
靖康元年詔立爲皇太子明年同一帝北遷初金帥之  
索太子也統制吳革謀匿民間遲疑不決者五日吳玠  
莫儔督脅甚急范瓊恐變生以危言讐衛士遂擁太子  
與皇后共車以出百官軍吏奔隨號哭太學諸生擁拜  
車前太子呼云百姓救我哭聲震天有弟訓北地所生  
紹興中碭山人留遇僧自言少帝第二子驗其詐黥竄  
之有自北至者曰淵聖小大王訓見居五國城

高宗太子粵生三歲苗傅劉正彥作亂逼帝禪位于粵

改元明受帝復位乃以粦爲皇太子數月薨諡元懿  
信王璩字潤夫初名伯玖藝祖七世孫秉義郎子彥之  
子生而聰慧與伯琮同育宮中賜名璩時生七歲矣紹  
興十五年加檢校少保進封恩平郡王出就外第時伯  
琮已封普安郡王璩官屬禮制相等夷號東西府普安  
郡王始立爲皇太子璩因加恩稱皇姪名位始定孝宗  
卽位授少保改靜江軍節度使改判西外宗正司璩累  
章乞閒改醴泉觀使淳熙中除少傅卒追封信王累贈  
太師子四人師淳歷永州防禦使師灝師淪師路並補  
武翼大夫孫希楸特補保義郎

孝宗四子長恪次愔次惲次光宗恪生於王邸早亡後追封邵王諡悼肅

太子愔初名愉故事皇太子出閣封王兼兩鎮然後加司空孝宗受禪愔自蘄州防禦使拜少保永興軍節度使進封鄧王異數也乾道初立爲皇太子用錢氏爲妃薨年二十四諡莊文服制見禮志子挺早亡寧宗命宗子希璘爲後更名思正累少師廬陵郡王卒諡簡惠

魏王愔初封慶王莊文薨孝宗立恭王爲太子加愔雄武保寧軍節度使進封魏王判寧國府夫人韋氏進封韓魏兩國夫人以示優禮愔究心民事築圩田之隤北

者帝手詔嘉勞後判明州輟屢邑田租以贍學得兩岐  
麥圖以獻改永興成德軍節度使揚州牧卒年三十五  
贈淮南武寧軍節度使兼徐州牧諡惠憲初帝聞王計  
泫然曰向越次建儲正爲此子福氣差薄耳子二摠  
亡柄封吳興郡王領昭慶軍節度使卒贈太保沂王諡  
靖惠子垓早亡寧宗立貴和爲後已而立貴謙以少師  
保康軍節度使加開府贈太傅封申王

寧宗八子垓坦增垓圻垓坻皆數月亡各加王封諡  
以冲冠

太子詢燕懿王後初名與愿六歲寧宗養宮中賜名欽

除福州觀察使進威武軍節度使封衛國公韓侂冑開  
邊職用翊善史彌遠計奏罷之職立爲皇太子加開府  
封榮王更名憐又更詢薨年二十九謚景獻理宗立乃  
裕爲後累少保保寧軍節度使贈少傅封臨川郡王  
鎮王竑宗室希瞿子也初爲沂王後賜名均改貴和寧  
宗皇子詢薨迺立貴和爲皇子賜今名授寧武軍節度  
使封祁國公後加檢校少保封濟國公竑生子賜名鉉  
授左千牛衛大將軍銓卒贈復州防禦使追封永寧侯  
竑好鼓琴丞相史彌遠買美人善琴者納諸御而厚廩  
其家使竑動息必以告竑嬖之宮壁有輿地圖竑指



瓊厓曰吾他日得志置史彌遠於此又嘗呼彌遠爲新恩以他日非新州則恩州也彌遠聞之嘗因七月七日進乞巧奇玩以覘之竝棄酒碎於地彌遠大懼曰夕思以處竝而竝不知也時沂王猶未有後方選宗室希璠子昀繼之一日彌遠爲其父飯僧淨慈寺獨與國子學錄鄭清之登惠日閣屏人語曰皇子不堪負荷聞後沂邸者甚賢今欲擇講官其善訓迪之事成彌遠之坐卽君坐也然言出於彌遠之口入於君之耳若一語洩者吾與君皆族矣乃以清之兼魏惠憲王府教授清之日教昀爲文又購尚宗書俾習焉清之上謁彌遠

昀詩文翰墨以示彌遠譽之不容口彌遠嘗問清之吾  
聞其賢已熟大要竟何如清之曰其人之賢更僕不能  
數然一言以斷之曰不凡彌遠頷之再三寧宗崩彌遠  
始遣清之往告昀以將立之意再三言之昀默然不  
應徐答曰紹興老母在清之以告彌遠益相與歎其不  
凡竝跂足以雷宣召久而不至彌遠在禁中遣快行宣  
皇子令之曰今所宣是沂靖惠王府皇子非萬歲巷皇  
子苟誤則汝曹皆處斬竝屬口墻壁間見快行過其府  
而不入疑焉已而擁一人徑過天已暝不知其爲誰甚  
惑昀旣至彌遠引入柩前舉哀畢然後召竝竝聞命亟

赴至則每過宮門禁衛拒其從者彌遠亦引入樞前舉  
哀畢引出帷殿帥夏震守之旣而召百官立班聽遺制  
則引竑仍就舊班竑愕然曰今日之事我豈常仍在此  
班震給之曰未宣制以前當在此宣制後乃卽位耳竑  
以爲然未幾遙見燭影中一人已在御坐宣制畢閣門  
贊呼百官拜舞賀新皇帝卽位竑不肯拜震捧其首下  
拜昀立是爲理宗皇后矯遺詔竑開府儀同三同進封  
濟陽郡王判寧國府帝因加竑少保進封濟王充醴泉  
觀使令就賜第寶慶元年正月湖州盜潘壬潘丙潘甫  
謀立竑竑聞變匿水竇中盜擁至州治以黃袍加其身

竑泣不從不獲已與之約曰汝能勿傷太后官家乎衆  
許諾守臣率官屬入賀是時壬等僞揭李金榜數彌遠  
廢立罪云今領精兵二十萬水陸竝進比明視之皆太  
湖漁人及巡尉兵卒不滿百人耳竑知謀不成率州兵  
誅賊遣王元春告于朝彌遠奏遣將討之至則事平彌  
遠令客秦天錫託召醫治竑疾諭旨逼竑縊州治計聞  
帝輟朝贈少師保靜鎮潼軍節度使給事中盛章權直  
舍人院王堅一再繳奏右正言李知孝累奏追奪王爵  
降封巴陵縣公於是真德秀魏了翁洪咨夔胡夢昱等  
每以竑爲言彌遠輒惡而斥之端平初詔復官爵妻吳

氏自請爲比丘尼賜惠淨法空大師月給鉢錢百貫度  
宗降詔追復元贈節度使德祐初常惺請立竝後又以  
王應麟奏下禮官議贈太師尚書令依舊節度使封鎮  
王謚昭肅賜其家田萬畝遣應麟致祭焉

理宗三子緝繹維皆早亡各加王封謚以冲冠

度宗六子長焯次憲次鋹次端宗次帝昀次帝昺焯生  
於東宮授容州觀察使封資國公憲授檢校太尉武安  
軍節度使封益國公與鋹俱早亡

宋史新編卷六十三

列傳五

明南京戶部主事莆田柯維騏著

宗室

趙令衿

趙令晟

伯振附

趙叔近

叔向叔敏叔憑附

趙訓之

諱之聖之附

趙士晤

士政士靖附

趙士隆

士醫士真士適附

趙士儂

士嶠

趙子直

趙子崧

趙子砥

子欒子重附

趙子灞

師標附

趙不羣

不諱不棄附

趙不怠

趙善俊

趙善譽

善悉

趙善湘

趙彥櫛

彥俊彥逾附

趙令衿燕懿王玄孫博學能文中大觀二年舍選靖康

初爲軍器少監言事忤旨奪官純興中以都官員外郎  
召張浚罷令衿請對留浚言官石公揆論其阿大臣復  
罷久之以事抵臨安李文會劾其昔爲大臣緩頰今復  
奔走請託詔送吏部吏部直令衿奏除德安府通判遷  
知泉州歸寓三衢葺會賓客觀秦檜家廟記口誦君子  
之澤五世而斬之句通守汪召錫檜兄壻也頗疑令衿  
諷教官莫汲訴其謗訓朝政侍御史董德元希旨以賊  
論劾詔下令衿獄按獄無狀乃坐謗訕奪官勒停檜銜  
令衿必欲置死地初訕鼎之子汾歸過衢令衿贐之侍  
御史徐嘉誣令衿與汾有密謀捕汾下大理寺俾汾自

誣與張浚等謀逆而令衿預焉獄上檜病不能省乃免  
檜死復爵授明州觀察使襲封加慶遠軍承宣使卒贈  
開府儀同三司

趙令晟令衿兄也初名令裨建炎初爲鄂州通守領兵  
戍武昌黃州遭寇掠令晟渡江存撫遂擢直龍圖閣知  
黃州賜今名賊張遇過城下招令晟度不能拒出見之  
遇飲以酒一舉而盡曰飲此必斃願勿戕軍民遇曰聊  
試公耳更取毒酒沃地地爲裂乃引去未幾賊丁進李  
成叛將孔彥舟迭至俱擊却之丁內艱詔起復時孟太  
后在南昌金人欲邀之徑犯黃州令晟已還在道疾趨



夜半入城翌日城陷被執大罵不屈而死事聞贈徽猷閣待制謚愍忠同死者都監王遠判官吳源巡檢劉卓各贈錄時又有趙伯振者燕懿王七世孫也第進上靖康末爲鄭州司錄捍禦有功就遷直祕閣通判州事建炎二年金人犯鄭州守臣董庠棄城走越八日城陷伯振率兵巷戰遂遇害贈朝請大夫官其一工

趙叔近魏悼王五世孫建炎元年爲秀州守杭卒陳通反抵城下叔近諭退之未幾差權兩浙提刑叔近招通置酒待之遂皆感服叔近奏請赦其徒二百餘人帝許之臺諫皆言不可遂寢叔近還秀州已而王淵兵至杭

詐傳呼云趙秀州來通郊迎淵遂誅之初淵在汴京仰  
周氏娼後歸叔近淵銜之乃誣叔近通賊奪職拘于州  
以朱芾代之芾肆殘虐軍民怨憤小卒徐明率衆囚芾  
迎叔近領郡事叔近不得辭因撫定之請擇守于朝奏  
未達朝廷命張俊致討俊淵部曲也辭行淵謂之曰叔  
近在彼俊喻意領兵至郡叔近出迎俊殺之徐明等遂  
反戈嬰城縱火驅掠俊捕明等誅之取周氏歸于淵後  
御史言叔近之寃贈集英殿修撰諸從有叔向者方汴  
京破時潛出之京西金人退引衆屯青城入至都堂叱  
王時雍等速歸政置救駕義兵其後部將于渙上變告

叔向謀爲亂詔劉光世捕誅之又有叔皎者爲德州兵馬都監建炎二年金人圍城叔皎力戰勢窮被執怒罵不屈遂遇害同叔皎死者通判王沂職官劉效陳思道馮經李岳杜開縣令張玘將佐盧亨等凡五十一人無降者又有叔憑者爲陝州都監金人圍州久援不至死之

趙訓之字誨道魏悼王六世孫也第進士知永豐縣建炎初孟太后避地虔州護衛統制杜彥等叛將犯永豐訓之與尉陳自仁分兵設伏殲其衆會賊別校繼至官兵未成列訓之與自仁俱被害事聞贈訓之朝散郎直

謝闕諡忠果自仁通直郎官其子訓之諸從有聿之者  
封安定郡王叔東子也建炎中爲成忠郎金人圍潭州  
派陷聿之巷戰大罵而死將官武經郎劉玠亦死之事  
聞贈聿之左監門衛大將軍玠武經大夫皆官其家後  
朱熹爲請立廟於潭賜號忠節又有壘之者爲上元丞  
金人過江壘之帥兵迎敵死之詔贈奉議郎官其家十  
人

趙士晤字公美濮安懿王曾孫也爲右監門衛大將軍  
貴州團練使從上皇北遷次洛州與諸宗室議欲遁還  
據城謀未就而金人圍台皆散走士晤乘驢西亡夜半

盜魁驢去徒步疾趨進明抵武安西家因至磁州集義  
兵以解洺圍旬日間得勝兵五千人歸附者數萬夜薄  
城下力戰破圍翌日入城礪將士死守飛火砲碎其攻  
具以計生得其首領敵乃解去遷權知洺州仍兼防禦  
使金人再犯洺糧盡援絕衆不能守乃擁士賸出城詔  
赴行在再遷平海軍承宣使知南外宗正事卒年四十七  
六贈少師益忠靖子不流歷臨安紹興帥治有聲濮王  
之後又有士跋者爲右監門衛大將軍吉州團練使靖  
康之難士跋間道遁去居邢州結土豪將舉事謀泄金  
人執而殺之貽保寧軍節度使諡忠果又有士晴者從

上皇北遷乘間變姓名入僧寺中落髮衣僧衣以行抵  
倉稽以覃恩轉千牛衛將軍奉朝請卒

趙士隆字景瞻系出太宗生五歲補右班殿直既長遊  
庠序一日投筆歎曰昔賢有不願爲章句儒出玉門關  
佩侯印者彼何人哉遂不復事科舉去爲郡縣吏累遷  
至淮南西路兵馬鈐轄以功遷三官秩滿授江東路鈐  
轄李成叛據江淮六七郡遣其黨馬進圍九江守臣姚  
舜明與士隆及副鈐轄劉紹先禦之進攻城益急城破  
衆號呼曰無殺我趙鈐轄成素服士隆之義欲以爲僞  
安撫使士隆怒罵曰賊欲屈我耶仰藥而卒年五十二

賊怒并殺其子三人屠其家數十口事聞贈武功大夫  
官其孫二人同時士醫者任秀州兵馬都監兀术至乘  
城拒戰城陷死之士真者權知信陽軍寇劉滿至拒戰  
死之士適者以武翼大夫守官江州馬進作亂遇害並  
贈官錄其尸

趙士儂字立之郇康孝王仲御第四子有大志好學善  
屬文累遷權同知大宗正事康王卽位除光山軍節度  
使黃潛善等用事士儂論其誤國出知南外宗正事嘗  
苗劉之變士儂易服入杭以蠟書遺張浚趣其勤王後  
遺書呂頤浩勉其同濟國難事平加檢校少保除

太宗正事歷加少師開府階判太宗正事金人既歸河  
南陝西地命士儼謁陵寢特封齊安郡王以旌其勞尋  
權主奉濮王祠事岳飛被誣士儼力辨曰中原未靖禍  
及忠義是忘二聖不欲復中原也臣以百口保飛無他  
檜諷言者論其交通蹤迹詭祕遂奪官万俟卨復希旨  
連擊之謫居于建凡十二年而卒年七十贈太傅追封  
循王進六子官長子不凡割股納蠟書告張浚以功轉  
兩官易文資從趙哲收復建州殺葉濃賜爵二級太宗  
之後又有士崙者亦知名累遷右監門衛大將軍惠州  
防禦使卒贈建寧軍承宣使追封建安郡王



趙子直字正之燕懿王六世孫也父令鐐寶文閣待制  
子直以蔭歷少府監主簿改河南少尹時治西內子直  
有幹才漕使宋昇器之歷官龍圖閣祕閣修撰除陝西  
轉運副使初蔡京鑄夾錫錢民病壅滯子直請鑄小鐵  
錢以權之因範格以進徽宗大說命以新錢百萬緡付  
五路均糴細麥子直領其事奏寬其限民便之會京再  
相言者希京意論子直亂錢法落職奉祠靖康初復祕  
閣修撰避金難奔荆南潰兵祝靖盛德破荆南城子直  
泣說之曰君輩宜亟還護社稷取功名無貪財擾州縣  
也皆應曰諾子直草檄趣之翌日皆北行紹興中累進

寶文閣直學士再知西外宗正司三京新復除京畿都  
轉運使以疾辭卒于家子洳幼警悟爲蘇軾所賞及長  
善談論工詩然徽宗屢興土木子洳每董其役識者鄙  
之

趙子崧字伯山系出燕懿王第進士官和間除徽猷閣  
直學士知淮寧府張邦昌僭位以書白康王宜遣師迎  
請兩宮問罪僭逆若議渡江恐誤大計遂與知潁昌府  
何志同等盟傳檄中外已而聞金人退又請進兵南京  
且言國家之制無親王在外者主上特付大王以元帥  
之權此殆天意亟宜承制號召四方豪傑則中原可傳

檄而定王命子崧充大元帥府參議官東南道都總管  
子崧移書責邦昌謂敵旣遠去宜速反正若少遲疑悔  
之無及又移書王時雍曰諸公相與亡人之國方且以  
爲佐命功臣不知平日所學何事會邦昌遣使迎王次  
第曰子崧子崧卽貽王書曰欲致中興當謹舉措宜先  
謁宗廟覲母后明正誅賞降霽四方尋以所部兵會  
州康王卽位建三屯之議以張聲勢除延康殿學士  
鎮江府兩浙路兵馬鈐轄上章論王時雍徐秉哲吳  
莫儔范瓊胡思王紹王及之顏博文余大均等逼遷上  
皇都人指爲國賊伏望肆諸市朝以爲臣子之戒

天監苗昌裔謂太祖後當再有天下子崧習聞其說靖  
康末起兵檄文頗涉不遜與統制辛道宗有隙道宗求  
得其文上之帝震怒不欲暴其罪謫居南雄州後赦復  
集英殿修撰而子崧已卒

趙子砥系出燕懿王父令珣歷官贈開府儀同三司子  
砥至鴻臚丞靖康北遷求得上皇宸翰懷以歸建炎二  
年六月至行在帝命輔臣召問于都堂子砥言金人講  
和以用兵我國斂兵以待和往者契丹主和議又真竟  
滅契丹今復蹈其轍譬人畏虎啗以肉食盡終必食人  
因復故宮命知台州卒羣從又有子櫟者元祐中第進

士爲汝州太守金人再渝盟破荊湖諸州獨于櫟能保境土李綱言于朝遷寶文閣直學士尋提舉萬壽觀卒又有子晝者少警敏強記工書翰累官徽猷閣直學士知秀州奉祠歸寓于衢卒

趙子瀟字清卿秦康惠王六世孫也父孝靖公令與子瀟孤貧能力學第進士累官華文閣待制知臨安府金主亮渝盟獻助軍錢十五萬緡孝宗志圖恢復練兵習爲鵝鵠魚麗陣上觀於便殿嘉之擢敷文閣直學士移知明州沿海制置使王十朋王大寶抗疏留之帝曰朕委以防海行召還矣海道平命知福州移泉州進龍

圖閣學士所至有善政卒于官年六十六子肅諸孫有  
師櫜者以罪拘管西外宗正司福建提刑王夢龍以智  
勇可用屬製軍器會寇逼尤溪令師櫜統卒數百往戍  
旣行大書于旗曰不與賊俱生人皆壯之賊兵至師櫜  
身爲先鋒戰沒贈武節郎錄其子

趙不群字介然太宗六世孫靖康初宰濟南章丘縣募  
效用五千人增城浚濠爲戰守備敵攻圍兩月不能下  
遷至直祕閣歷知廬州鄴瓊叛擁不群北去尋釋之高  
宗召問瓊叛故對曰由劉錡除制置瓊等以爲圖已兼  
撫諭後時故叛帝悔之累遷兩浙路轉運副使卒不群

諸從有不試者建炎元年知相州明年金人大入州又被圍不試知事不可爲遂登城與金人約勿殺許之既啓門乃納其家井中然後以身赴井命提轄官實以土州人皆免於死又有不棄者爲江東轉運判官秦檜忌四川宣撫使鄭剛中以不棄能制之除宣撫司總領官二人不相能檜併召還剛中在蜀服用頗踰制不棄復文致其事檜乃罷剛中連權不棄敷文閣直學士知紹興府時浙東旱饑民流亡提舉秦昌時檜兄子也不棄媚檜言其悉心振恤多全活昌時得遷秩云

趙不惠字仁仲系出太宗父士圍從上皇北遷不惠補

保義郎紹興末第進士歷永州通判帥司檄錄靖州獄  
平反數十百人靖人繪像祠之除知開州郡有鹽井以  
羨餘代民輸民絕鬪爭夜戶不閉諸司交薦以比古循  
吏轉夔州轉運判官開人數千遮城門不得行改成都  
路轉運判官黎州青羌奴結兒反朝廷命攝制司不怠  
檄諸蕃部生獲吐蕃一人賞十縑殺一人二縑於是印  
部川首領崖襪合諸部落大破吐蕃於漢源斬夢東畜  
列首來獻凡十有六日而平除成都提刑改江西路轉  
運判官廷臣薦其賢詔授右監門衛大將軍惠州防禦  
使知大宗正事非常制也陞招慶軍承宣使不怠以文



行訓勉族屬奏新學宮增廣弟子員倣太學校定法置  
自訟齋使有過者讀書其中人人感勵卒年六十七贈  
開府儀同三司封崇國公不怠篤孝力學立朝好言天  
下事蜀中武帥操重權不怠請復置安撫司相維而治  
其論王朴不宜揀選諸路軍王友直不可爲副都指揮  
使尤人所難言者張栻死爲請謚又請用朱熹其好尚  
如此

趙善俊字俊臣太宗七世孫父不衰閬路兵馬鈐轄善  
俊初補承節郎紹興末第進士歷太府寺丞尋攝帥知  
廬州會江浙饑民糜至善俊括境內官田均給之貸牛

種僦屋以居死者爲給樁人至如歸累遷龍圖閣直學  
士加祕閣修撰歷知鎮江府卒年六十四善俊風儀秀  
整喜功名孝宗時日中有黑子地屢震每以飭邊備爲  
戒孝宗英武獨運缺相者累年善俊極言相位不可無  
人尤人所難言者

趙善譽字靜之不倚之子善俊諸從也乾道五年試禮  
部第一初調昌國簿攝邑事勸編戶裒金買田以助昏  
葬守薦于朝授兩浙運幹累遷大理丞湖北常平茶鹽  
提舉移潼川路提刑轉運判官以羨貲給諸郡置莊民  
生子及姪者俱給米宗子寓蜀者少業儒卽郡庠立學

教之引年乞祠歸處一室以圖書自娛卒年四十七善  
譽居官廉靖多所著述郭雍朱熹嘗取其易說云又有  
善悉者武翼郎不尤之子第進士累官敷文閣直學士  
兩浙轉運副使

趙善湘字清臣濮安懿王五世孫父武翼郎不陋從高  
宗渡江居明州善湘以恩蔭至忠訓郎慶元二年第進  
士累遷右文殿修撰知鎮江府封祥符縣男賜食邑寶  
慶二年連進寶章閣待制沿海制置使兼知建康府江  
東安撫使進封子加食邑紹定元年以扞防江軍寧淮  
軍及平楚州畔寇功皆升其官進龍圖閣待制仍任兼

江東轉運副使三年進煥章閣直學士仍任進封伯加  
食邑以李全犯淮東進煥文閣學士江淮制置使乃命  
專討許便宜從事四年進封侯加食邑及戮全善湘遣  
使以露布上乃進兵部尚書仍兼任時善湘見范葵進  
取慰藉殷勤餽問接踵有請必應選諸子屯寶應以從  
范葵亦讓功督府善湘季子汝楫丞相史彌遠壻也故  
奏報無不達累功進至資政殿大學士封天水郡公屢  
加食邑歷知紹興府兼浙東安撫使前後兩奉祠淳祐  
二年進觀文殿學士守本官致仕卒贈少師當彌遠之  
卒也臺臣嘗劾善湘結納彌遠怙勢肆姦帝以平難功

免其罪所著有周易約說周易或問周易續問周易指  
要學易補過洪範統論中庸約說大學解論語大意孟  
子解老子解春秋三傳通議詩詞雜著汝棣知寧國府  
以舉職升直華文閣後爲太府少卿淮東總領財賦

趙彥橚字文長訓之之孫也第進士累官監登聞檢院  
韓侂冑方柄用朝士悉趨其門彥橚切歎惋乃出知汀  
州侂冑死詔檢詳士大夫與兵議者將併逐之彥橚歎  
曰士方以僞學廢今又以兵端斥苟欲錮士何患無名  
每見帝必言才難遷湖廣總領舊士卒物故大將不落  
其籍而私其月請彥橚置別籍稽核之持之三年掛虛

籍者贏三萬額減錢百萬緡比去餘七百萬而諸路累  
積逋負猶四百萬盡蠲之知平江府至寶謨閣待制諸  
從有彥倓者字安卿累遷湖南運判尋知紹興府復鹿  
鳴禮置興賢莊以資其費築捍海石塘亦置莊以備增  
築會旱饑舉緡錢四十萬助荒政民賴以濟詔改太府  
少卿遷顯謨閣知太平州終江西轉運使又有彥逾者  
字德光第進士至工部尚書樞密趙汝愚議立嘉王欲  
倚殿帥郭杲爲用郭杲嘗被誣彥逾爲白于帝杲德之  
至是彥逾馳告杲許諾遂領兵爲衛寧宗卽位汝愚謂  
彥逾我輩宗臣不當言功會留正免相汝愚登右揆彥

逾竟外除麻資政殿大學士知明州嘉定間乞祠以歸  
尋卒彥逾冀汝愚引已共政頗缺望乃疏當時名臣上  
之目爲汝愚黨其兩入蜀皆有聲然奏復利西安撫領  
以武帥遂致吳曦之變云又有彥呐者字敏若居彭州  
登四川類試第吳曦叛以祿禧僞守夔彥呐結義士殺  
之遂顯名嘉定十二年關外西和州新被兵制使安丙  
檄使經理金人再至戰却之轉提點刑獄尋帥沔時譽  
甚都及崔與之代丙始察其大言無實謂他日誤事者  
必此人請廟堂毋付以邊藩尋奪節制寶慶初移帥興  
元三年會鄭損棄四州退保三關彥呐力爭不勝罷歸

家者五年紹定四年桂如淵代損起彥呐於副使更李  
直黃伯固替彥呐副之端平初升正使三年元兵大入  
至三泉彥呐大敗貶衡州其子洗夫用事亦竄嶺南史  
嵩之留之江陵卒

宋史新編卷六十三



宋史新編卷六十四

列傳六

明南京戶部主事莆田柯維騏著

宗室

趙汝愚

崇憲公愚良淳

趙汝騰

趙汝談

汝譙汝述附

趙師舜

趙希言

趙希懌

趙希館

趙希洎

趙與權

與憲附

趙孟錦

孟量孟余附

趙時賞

趙汝愚字子直漢王元佐七世孫居饒之餘干父善應字彥遠官終江西兵馬都監性純孝親病刺血和藥以進居喪嘔血骨立故人之孤女貧無所歸聘爲子婦道

見病者必收恤之歲饑旦夕率其家人輟食之半以飼  
饑者夏不去草冬不破壞懼百蟲之遊且蟄者失其所  
也丞相陳俊卿題其墓碣曰宋篤行趙公彥遠之墓汝  
愚早有大志每曰丈夫得汗青一幅紙始不負此生擢  
進士第一簽書寧國軍節度判官召試館職除祕書省  
正字孝宗方銳意恢復始見卽陳自治之策孝宗稱善  
遷校書郎知閣門張說擢簽書樞密院事汝愚不往見  
率同列請祠未報會祖母訃至卽日歸因自劾上不加  
罪累遷祕書少監兼權給事中內侍陳源有寵於德壽  
宮添差浙西副總管汝愚言不宜使居總戎之任孝宗

喜詔自今內侍不得兼兵職權吏部侍郎兼太子右庶  
子論知閣王抃招權預政出抃外祠以集英殿脩撰卽  
福建進直學士制置四川兼知成都府召還光宗受禪  
趣召未至殿中侍御史范處義論其稽命除知潭州辭  
改太平州進敷文閣學士知福州紹熙二年召爲吏部  
尚書上常以五日一朝孝宗於重華宮至是往往以疾  
免至會慶節上壽駕不出冬至朝賀又不出汝愚往復  
規諫兩宮之情通四年汝愚知貢舉與監察御史汪義  
端有違言汝愚除同知樞密院事義端言祖宗之法宗  
室不爲執政詆汝愚植黨沽名䟽上不納又論臺諫紛

舍陰附汝愚一切緘默不報論汝愚發策譏訕祖宗又不報汝愚力辭上爲徙義端軍器監給事中黃裳言汝愚事親孝事君忠居官廉憂國愛民出於天性義端實忌賢不可以不黜上乃黜義端補郡汝愚不獲已拜命未幾遷知樞密院事辭不拜有旨趣受告汝愚對曰武興未除帥臣心不敢安上遂以張詔代領武興軍事在詔傳光宗之疾生於疑畏其未過宮也汝愚數從容進諫光宗出聞其語輒悟入輒復疑五年春孝宗不豫夏五月疾日臻光宗御後殿丞相率同列入請上詣重華宮侍疾從臣臺諫繼入光宗益疑起入內越二日宰相

又請對光宗令知閣門事韓侂冑傳旨云宰執竝出於是俱至浙江亭俟命孝宗聞之憂甚嗣秀王簡傳孝宗意令宰執復入侂冑奏請自往宣押汝愚等乃還第六月丁酉孝宗崩上以疾不出留正與汝愚議介少傅吳琚請憲聖太后垂簾暫主喪事以國本係乎嘉王欲因簾前奏陳宗社之計使命出簾幃則體正言順可無後艱而吳琚素畏慎且以后戚不欲與聞大計此議竟格丁未宰臣已下待對和寧門不報乃入奏云皇子嘉王仁孝夙成宜早正儲位以安人心又不報越數日再請御批付丞相云歷事歲久念欲退閒留正見之懼因朝

臨佯仆于庭密爲去計汝愚自度不得辭其責念故事須坐甲以戒不虞而殿帥郭杲莫有以腹心語者會工部尚書趙彥逾至私第語及國事汝愚泣彥逾亦泣汝愚託彥逾達郭杲彥逾復命議遂定自吳琚之議不諧汝愚與徐誼葉適謀可以白意於慈福宮者乃因蔡必勝招韓侂胄以內禪之意請于憲聖侂胄因所善內侍張宗尹以奏不獲命明日往又不獲命侂胄遂巡將退重華宮提舉關禮見而問之侂胄具述汝愚意禮令少俟入見憲聖而泣憲聖問故禮曰聖人讀書萬卷亦嘗見有如此時而保無亂者乎今丞相已去所賴者趙知

院旦夕亦去矣將如天下何願聖人三思憲聖令諭好  
爲之翌日禪祭憲聖垂簾汝愚率同列奏乞立皇子嘉  
王爲太子以繫人心且以御批退閒之語請之處分憲  
聖乃命皇子卽位語在寧宗紀汝愚卽喪次召還留正  
長百僚命朱熹待制經筵悉收召士君子之在外者是  
月上命汝愚兼權參知政事留正至汝愚乞免兼職乃  
除特進右丞相汝愚辭不拜曰同姓之卿不幸處君臣  
之變敢言功乎乃命以特進爲樞密使汝愚又辭特進  
孝宗將攢汝愚議攢宮非永制欲改卜山陵與留正議  
不合侂冑因而間之出正判建康命汝愚爲光祿大夫

右丞相汝愚力辭至再三不許汝愚本倚正共事怒侂  
冑不以告及來謁故不見侂冑慙忿簽書樞密羅點曰  
公誤矣汝愚亦悟復見之侂冑終不懌自以有定策功  
且依託肺腑出入宮掖居中用事朱熹曰汝愚當以厚  
賞酬勞勿使預政而汝愚謂其易制不爲慮侂冑日夜  
謀引其黨爲臺諫以擯汝愚汝愚不虞其姦趙彥逾除  
四川制置意亦不願與侂冑合謀陞辭日盡疏常時賢  
者姓名指爲汝愚黨上意不能無疑會黃裳羅點卒侂  
冑又擢其黨京鏗代點汝愚始孤天子益無所倚信於  
是陳傅良吳獵劉光祖各先後斥去羣憚和附視正士



如仇讎而衣冠之禍始矣。佞胄欲逐汝愚而難其名，或  
教之曰：彼宗姓，誣以謀危社稷，則一網無遺。佞胄然之，  
擢其黨李沐爲正言，嘗求節度使於汝愚，不得，奏汝愚  
將不利於社稷。汝愚出浙江亭待罪，遂罷相，除觀文殿  
大學士，出知福州。臺臣謝深甫等合詞乞寢，與郡遂與  
祠國子祭酒李祥、博士楊簡以爲言。李沐劾祥、簡罷之。  
太府丞呂祖儉亦上書訴汝愚之忠，坐朋比，罔上送韶  
州安置。太學生楊宏中、周端朝、張衡、林仲麟將傳徐範  
等伏闕言去歲人情驚疑，變在朝夕。當時假非汝愚出  
死力定大議，雖百李沐罔知攸濟。當國家多難，汝愚不

以此時爲利今上下安恬乃獨有異志乎書上悉送五  
百里外羈管侂冑忌汝愚益深謂不重貶人言不已以  
中丞何澹疏落大觀文監察御史胡紘疏汝愚唱引僞  
徒謀爲不軌乘龍授鼎假夢爲符責寧遠軍節度副使  
永州安置初汝愚嘗夢孝宗授以湯鼎背負白龍升天  
後翼寧宗以素服登大寶蓋其驗也而讒者以爲言時  
汪義端行詞用漢誅劉屈氂唐戮李林甫事示欲殺之  
意迪功郎趙師召亦上書乞斬汝愚汝愚怡然就道謂  
諸子曰觀侂冑之意必欲殺我我死汝曹尚可免也至  
衡州病作爲守臣錢鏊所窘暴卒天下聞而冤之特廢

元二年正月壬午也年

汝愚學務有用常以司

馬光富弼韓琦范仲淹自期所著詩文十五卷太祖寶  
錄舉要若干卷類宋朝諸臣奏議三百卷汝愚聚族而  
居門內三千指所得廩給悉分與之菜羹蔬食恩意均  
洽人無間言自奉養甚薄爲夕郎時大冬衣布裘至爲  
相亦然後復資政殿學士太中大夫贈少保侂冑誅復  
元官諡忠定贈太師追封沂國公理宗詔配享寧宗廟  
庭追封福王後進封周王子九人長崇憲孫必愿曾孫  
良淳並以忠孝世其家

崇憲字履常淳熙中以取應對策第一後復以進士對

策擢甲科歷江西轉運司幹辦公事監西京中岳廟改  
奉議郎知南昌縣事奉行荒政所活甚衆寧宗念汝愚  
功下制升崇憲籍田令陳䟽力辭謂先臣之寃未悉昭  
白而其孤先被寵光非公朝所以勸忠孝厲廉恥之意  
俄改監行在都進奏院復引陳瓘論司馬光呂公著復  
官事申言之累遷著作佐郎兼權考功郎官請外知江  
州郡民歲苦和糴崇憲䟽蠲之且轉糴旁郡以備歲餉  
瑞昌民負茶引錢困不能償死則以責其子孫猶弗貸  
會新券行視舊價幾倍徙崇憲亟請以新券一償舊券  
二受賜者千餘家修陂塘以廣溉灌凡數千所提舉江

西常平兼權隆興府及帥漕司事遷轉運判官仍兼帥  
事以兵部郎中召改司封皆固辭遂直祕閣知靜江府  
廣西經略安撫靜江之屬膏腴地肥磽略等而陽朔修  
仁荔浦之賦獨倍張栻奏減人猶以爲病崇憲請再加  
蠲減詔遞損有差三縣民立祠刻石邕爲邊要害地扞  
防之備歲久寢弛而溪峒口彊崇憲條上其議朝廷頗  
采其言然未及盡用也崇憲天性篤孝終喪不飲酒食  
肉比御猶弗入者久之

必愿字立夫崇憲之子以入父汝愚遺表補官第進士  
知崇安縣秩滿民共立祠刻石歷度支郎中理宗詔以

汝愚配享寧宗從必愿請也兼右司郎中引見疏言天下者祖宗之天下也非陛下所私有也陛下雖有去徹之心而動涉可疑之迹陛下亦何樂於此三京兵敗邊事甚亟詔條上守禦計以愿言十事皆切於邊要政府議楮幣日輕欲令諸州用印及他爲稱提之法必愿力爭不可嘉熙元年貽書政府論邊防事宜授右司郎中火災應詔上封事曰開邊稔禍之刑牽制而未行激變棄城之戮姑息而未舉京襄淪沒祖宗之基業莫能保淮蜀蹂躪赤子之冤死無所依履畝之令下而加以節配稱提之法嚴而重以告訐民無蓋藏每有轉輸之

憂士不宿飽常有思亂之志又曰臺諫給舍骨鯁之論  
莫容左右便嬖浸潤之口易人春夏常享闕略於原廟  
之尊節鉞隆恩殷勤於邸第之貴又論濟王及國本事  
遷左司郎中又遷司農少卿兼左司轉對言端平初年  
沉痾方去新病未作陛下猶勤於咨訪如恐不及今疾  
攻心腹決裂將潰乃不求瞑眩之劑以起其殆甚可惑  
也又曰母使人臣以稍長懷疑母致陛下以厭言得謗  
時直士相繼去故必愿以乏累遷權吏部右侍郎兼國  
史修撰時邊事急必愿應詔區畫皆中事機歷戶部侍  
郎兼給事中先是錢相嘗繳陳洵益贈節使不行必愿

復繳奏曰李韶同爲殿中侍御史疏論洵益奪職韶不能自安徑求外補今召之不至正以此故若超贈洵益又繳駁不行韶愈無來期金陛下忍於去一賢從官而不忍於沮一已死之內侍品何以興起治功振揚國勢欲望寢洵益節鉞超韶供職於是必愿三以疾乞祠不許權戶部尚書疏迂丞相高之乞免官乞祠皆不許司諫鄭起潛論之乃以寶議閣直學士奉祠辭職名不許淳祐五年以華文閣直學士知福州福建安撫使三辭不許必愿平易以近民忠信以厚俗尤留意武事甫入境卽以軍禮見戎帥中左翼軍節制事宜居官四



年累乞歸及命召又三辭皆不許卒贈銀青光祿大夫  
必愿性至孝居喪盡禮才周器博心平量廣而又聞家  
庭之訓得黃幹之學故所立卓然可稱云

良淳字景程用蔭登仕所至以辨治稱未嘗干人薦舉  
最後知安吉州時元兵屢陷州縣知州李庚遁百事隳  
廢良淳至日與僚吏營守禦之備朝議尋以徐道隆爲  
提刑以輔良淳加良淳直祕閣范文虎等遣使持書招  
降良淳與道隆怒焚書斬其使元兵迫獨松關有旨趣  
道隆入衛道隆旣去元兵至軍其東西門良淳率衆城  
守戍將吳國定開南門納外兵良淳命車歸府兵士止

之曰侍郎當爲自全計良淳叱去之命家人出避閑閣  
自經死元兵隨追及道隆於道江陵一軍盡沒道隆見  
執艦內間守者少急赴水死長子載孫亦赴水死贈官  
賜諡立廟安吉道隆字伯謙武義人

趙汝騰字茂實系出太宗居福州登寶慶進士自籍出  
令試館職授祕書正字連升祕書郎兼史館校勘歷遷  
權工部尚書兼權中書舍人兼史職陳垓論罷之召爲  
禮部尚書兼給事中兼史職入奏言前後姦諛之臣傷  
善害賢自取穹官要職何益於陛下而深損於聖德興  
利之臣移東就西順適官禁自遂溪壑無厭之欲何益

於陛下而深戕於國脈又言陛下有用君子之名無用  
君子之實拜翰林學士兼知制誥兼侍讀辭歸故里累  
召力辭以龍圖閣學士知紹興府浙東安撫使召爲端  
明殿學士提舉佑神觀兼翰林學士承旨知泉州知南  
外宗正事復以內祠兼侍讀兼翰林學士承旨卒贈四  
官

趙汝談字履常系出太宗以恩補將仕郎登進士第歷  
添差江西安撫司幹辦公事嘗佐丞相趙汝愚定大策  
將處以詞掖力辭汝愚去國其弟汝讜上疏乞留汝愚  
斬佞胄聞者吐舌兄弟罹黨禍斥去後自太社令試館

職擢正字以言去奉祠添差通判嘉興府改知無爲軍  
與光州守柴中行安豐守陵峻俱稱循吏時金人內變  
獻料敵備邊二策累遷江西提舉常平寧宗崩哀痛得  
疾賀理宗表力寓勸戒陳碩曰此諫書也數旬祠授江  
西轉運判官未幾以言者罷先是汝談因疾去官言者  
謂其傲睨軒冕不樂爲世用至是史彌遠不與祠迺杜  
門著述端平初以禮部郎官召歷權吏部侍郎升侍讀  
兼直學士院兼同修國史院同修撰迂時宰意以言去  
奉祠起知婺州召赴行在權禮部侍郎兼學士院力辭  
兼直時金兵新破三閫增秩稱提官楮四邵復實汝談

獨蹙頰登對首䟽言邊面無可倚仗乞超越拘攣簡拔  
俊傑如吳用周瑜魯肅管任祖逖陶侃故事使之各分  
方面連數十城推轂授權盡歸賜履一切便宜行事不  
復更從中御且曰臣之此策行於開禧未用兵之前決  
不至罹今日之患其論楮法尤中時弊上稱歎又之以  
老祈免章四上免兼直政侍講數日仍兼直學士院五  
辭權給事中權刑部尚書卒轉兩官遺表上又轉四官  
汝談天資絕人沈思高識自少至老無一日去書嘗從  
朱熹訂疑義熹嗟異之其論易以爲爲占者作書堯舜  
二典宜合爲一禹功只施於河洛洪範非箕子之作詩

不以小序爲信禮記雜出諸生之手周禮疑傳會女主  
之書要亦卓絕特立之見爲文章有天巧篤於倫誼而  
忘仇怨御史王益祥嘗劾之後汝談官其鄉益祥愧不  
敢見汝談乃數過之相得歡甚嘗論韓非李斯皆有荀  
卿之才惟其富貴利欲之心重故世得而賤之惟卿獨  
能守其身不苟希合士何可不自重哉所著有易書詩  
論語孟子周禮禮記荀子莊子通鑑杜詩注汝讜字蹈  
中少倣儻有智略龍泉葉適嘗過其家汝讜年少衣短  
後衣不得避適勸之曰名門子安可不學汝讜慙自是  
終身不衣短後衣折節讀書與兄汝談齊名以恩補承

務郎歷監行在右藏西庫以黨汝愚坐廢十年後登進士第歷司農永與史彌遠不合請外改湖南提舉常平易江西尋提點刑獄徙湖南遷知溫州卒汝讜常言宗子不忘君孝子不辱身臨難則功業當如朱虛立身當如子政云有汝述者字明可同出太宗也曾祖士說從二帝北遷臨河罵敵而死汝述淳熙十一年第進士累遷刑部尚書知平江府卒汝述上封事論議懇惻立朝薦引多知名士然爲時相所親躡躋通顯人亦以此少之

趙師曁字從善燕懿王八世孫也父伯驥少以文藝侍

高宗于康邸積官至和州防禦使師曁第進士附韓侂  
冑得尹京侂冑生日百官爭貢珍異師曁後至出小合  
曰願獻少果核侂觴啓之乃栗金蒲萄小架上綴大珠  
百餘衆慙沮侂冑有愛妾十四人或獻北珠冠四枚侂  
冑以遺四妾其十人亦欲之未有以應也師曁聞之亟  
出錢十萬緡市北珠製十冠以獻妾爲求遷官得轉工  
部侍郎侂冑嘗飲南園過山莊顧竹籬茅舍謂師曁曰  
此真田舍間氣象但欠犬吠鷄鳴耳俄聞犬嗥叢薄間  
視之乃師曁也侂冑大笑久之以工部尚書知臨安府  
侂冑將用兵師曁度侂冑材疎意廣必召禍乃持異論



侍御史鄧友龍劾罷之仇胄死其黨多坐謫以師曩嘗  
與仇胄異故獲用除寶謨閣直學士知鎮江府未幾爲  
兵部尚書知臨安府會武學生柯子冲盧宣德以事至  
府師曩擅撻遣之衆盡譴文武二學之士交投牒師曩  
罷免與祠卒于家

趙希言字若訥惠王令憲元孫也淳熙中第進士歷知  
臨安仁和縣闢學宮四百餘畝臨平塘隄決親捧土投  
石兵民爭奮隄成因築重隄後不復決遷樞密院編修  
官兼右司上言諸將宜諭以戰爲守毋以守爲守累遷  
祕書丞著作郎軍器少監皆兼右司又充樞密院檢詳

爲宰屬樞掾凡六年奉祠卒年六十一贈資政殿大學士謚忠憲子與權亦登第再中刑法科官至開府儀同三司

趙希懌字伯和系出燕懿王淳熙中第進士趙汝愚帥福建希懌爲屬吏嘗言治人如脩身治政如理家愛民如處昆弟取古今官著惠愛者緝爲一編曰是吾師矣汝愚嘉而薦之汝愚當國歷遷江西茶鹽提舉陞本路帥兼漕事知平江太平皆有惠政已而乞祠加昭信軍節度使開府儀同三司致仕卒年五十八贈少保趙希鎰字君錫舊名希喆慶元二年第進士賜名綱

汀州司戶峒寇李元礪方起汀人震懼郡會僚佐議守  
城希館曰守城非策也距城三十里有古城關若悉精  
銳扼其衝賊不足慮矣守以付希館人爲危之希館審  
形明間申令謹候夜半賊數百銜枚突至矢石俱下賊  
無一免餘黨聞風遁事聞詔升州推官累遷吉州刺史  
提舉佑神觀輪對論今日多事之際未有辦事之人朝  
紳清選也以緘默爲清重以刻薄爲舉職以無所可否  
爲識體閫寄重任也以大言爲有志以使過爲知恩臣  
非敢厚誣天下以爲無人患在選擇未得其道器使木  
當其才爾授成州團練使進和州防禦使理宗卽位連

進安德軍承宣使升節度封信安郡公卒希鑑風資凝  
重曾抱慰壘揚人之善急人之難居官祁寒盛暑未嘗  
謁告衣食取裁足而已追封信安郡王

趙希洎居宜春歷官至戶部尚書咸淳中忤丞相賈似  
道出領廣東轉運使德祐元年與從子必向避地贛州  
亂定歸里時袁守聶嵩孫希洎內嫻也勉之降元不能  
屈文天祥兵敗以失言與必向俱被囚辭節愈厲家人  
饋食則碎器覆諸地俱不食據榻而死

趙與權字悅道燕懿王八世孫嘉定進士歷直寶章閣  
知安吉州設銅鑿縣門以便訴冤有富民懃幼子姑逮

付獄徐廉之乃二兄強其父析業與權曉以法開以天  
理皆忻然感悟又嫠嫗僅一子以不孝告留之郡廳日  
爲饌俾親饋晨昏以禮母子遂如初二家皆畫像事之  
喪母朝廷屢起復固辭終禪奉祠復半載乃起朝自恢  
復退師又議納使與權言在朝迎合政出多門必得智  
識氣節之士布列中外可也遷宗正少卿兼權戶部侍郎  
尋兼知臨安府浙西安撫使郊祀之夕大風雷䟽言  
國本未定又陳弭盜固本之策且言朝令夕改非以示  
作新旁蹊曲徑非以肅紀綱理宗爲悚然又建言秦刻  
頌有端平法度語明年改元嘉熙遷戶部侍郎兼權兵

部尚書論邊事至爲深切星變上章請罷火災五請竄  
於是中丞方大琮言與權素自潔修䟽財輕爵乞俞所  
請使小大之臣皆知引咎乃收一階尋復之遷戶部尚  
書兼權吏部累囚祠不許論楮幣區畫甚備其後詔宰  
相徧詢侍從有欲以端平錢當五行使與權謂開禧嘗  
以二當三何救於楮且曰士大夫不清白奉法恪意扶  
持雖日易一法何益大風震雷數見因具陳邊事遷吏  
部尚書力求歸田會潮汐潮隄執政道帝意留治之授  
端明殿學士知臨安府浙西安撫使江隄竣事獄空  
囚罷出關遣使趣還會歲饑民相攜溺死仍付臨安府

事恩例視執政與懽涕泣奉詔亟榜諭各全性命佇沐  
聖恩都人相謂毋死與懽上則祈哀公朝下則推誠勸  
分甘雨隨至米商來集流移至者有以濟之力求納祿  
許之與懽至浙江上召還即日絕江去帝爲悵然與懽  
三爲府尹盡力民事都人稱趙端明必以手加額曰趙  
佛子也久之以舊職知溫州以侍讀召進春秋解升大  
學士史嵩之將復相人言不已帝以問與懽言嵩之老  
師費財私暱貪富過立名譽不宜復用時嵩之猶子璟  
卿誦言其過忽斃而杜範劉漢弼徐元杰三賢暴死人  
皆疑嵩之致毒與懽請優恤帝從之在講筵言以壞證

付庸醫僅支殘息徒運巧心天下事尚堪再誤耶時相  
忌之尋授安德軍節度使開府儀同三司萬壽觀使口  
食應詔言事益切月賜內帑與懽辭不取帝書安貧樂  
道植節秉忠字以賜建儲未定乃申言之袁士宋斌少  
從黃幹李燔登朱熹之門學禁方嚴羈旅困沮年且八  
十與懽延之事以父行奏乞用旌禮布衣故事死葬西  
湖上歲一祭焉五乞免朝請三乞致仕俱不允賜泰卦  
詩忠邪辨自是國事皆縷縷言之有不勝書蓋其愛君  
憂國本諸天性拜少傅卒遺表猶不忘規正帝震悼追  
封郡王謚清敏累贈太師與懽手注六經及仁皇訓典



詳釋又有高宗寶訓要釋奏議詩文自卷嘗謂士大夫  
有貪聲則雖奇才與學徒以蠹國害民爾故歟之夕而  
金帶猶質錢民家云諸從有與憲者字德淵居湖州嘉  
定十三年第進士歷官吏部尚書觀文殿學士累典方  
州最後爲淮浙發運使差知平江府特轉兩官致仕卒  
贈少師與憲所至急於財利幾於聚斂之臣焉

趙孟錦少不羈遊淮以軍功爲將佐德祐元年元兵攻  
真州孟錦與知州苗再成率兵大戰于老鸛背加孟錦  
揚州都統司計議官元兵重艦駐江上孟錦乘大霧來  
襲俄霧解日已高元兵見其兵少逐之登舟失足墮水

身荷重甲溺焉同時有孟壘者居合州第進士爲金華尉臨安旣降元孟壘懷太皇太后帛書詣端宗擢宗正寺簿監軍復明州戰敗見獲不屈磔死又有孟采者與芮從子也臨安旣降元孟采謀舉兵興復事泄爲叛臣范文虎所執文虎恚其謀逆孟采詬之曰賊臣負國恩共危社稷我帝室之胄欲一刷宗廟之恥乃更以爲逆乎文虎怒驅出斬之

趙時賞字宗白居太平州第進上累官知旌德縣德祐初捍元軍有功升直寶章閣軍器太監從二王入閩端宗卽位擢知邵武軍言者以棄城論罷之文天祥聞部

督府于南劔奏辟江西招討副使數以偏師當一面時  
賞俊爽慷慨有謀策尤爲天祥所知空坑兵敗走吳溪  
被執不屈死之時賞在軍中特見同列盛輜重節如侍  
歎曰軍行如春遊其能濟乎詳見文天祥傳三

宋史新編卷六十四